

LA  
GVYENNE  
AVX PIEDS  
DV ROY,

QVI SE PLAINT DE SES ENFANS,

ET

QVI DEMANDE A SA MAIESTE'  
la continuation de la Paix interrompuë.

*Discours Moral & Politique, qui monstre l'obeyssance que  
l'on doit aux Roys, & l'obligation à quoy leurs Majestez  
sont engagées d'aimer, & de conseruer leurs Peuples,  
dont ils sont les Protecteurs, & les Peres.*



A PARIS.  

---

M. DC. XLIX.



LA  
GUYENNE

DV ROY

CIVIL DEMAND A LA MORT  
la condamnation de l'Etat

Par le Tribunal de l'Etat  
CIVIL DEMAND A LA MORT  
la condamnation de l'Etat

112  
M. D. C.





# LA GUYENNE

AVX PIEDS

D V R O Y.

*QUI SE PLAINT DE SES*

*Enfans, & qui demande à sa Majesté*

*la continuation de la Paix*

*interrompue.*



VEL plus grand déplaisir, & quel plus sinistre accident me pouvoit-il arriuer, que de me voir déchirée par les mains mesmes de ceux que j'ay nourris, allaittez, & portez dans mes entrailles? Ah! indignes enfans, enfans corrompus, engeances de viperes, Race peruerse, quelle furie, quelle rage vous a portez à vous armer contre vous-mesmes, à vous perdre en me perdant, & vous enseuelir sous mes ruines! De quels malheureux principes sont donc sortis ces mouuemens si farouches, & des deportemens si barbares, que d'une multitude de Citoyens, viuaus sous l'autorité d'un mesme Prince, vous foyez aujourdhuy conuertis en vn monstre hideux & épouuentable. De quel Enfer sont sortis ces écrits iniurieux, & pleins de fiel, ces paroles enuenimées, & ces outrages tirez des



lieux les plus infames. D'où sont venuës ces Megeres  
écheuclées, qui ne se contentans pas de l'aigreur de  
leurs voix seditieuses, passent mesme à l'insolence des  
actions les plus forcenées, conuertissent les traits de  
plume en autant de coups d'espées, trempēt la terre du  
sang de leurs semblables, & la couurent de corps morts?  
D'où vient cette correction, qui ne regarde pas comme  
elle amandera, mais comme elle acheuera de tout per-  
dre? D'où vient cette cruelle & sanglante Chirurgie,  
qui ne se soucie pas de guerir, & qui ne pense qu'à dé-  
chirer la playe, & à l'aigrir par le remede qu'elle propo-  
se? Son fer, son rasoir & sa sie, ne seruent d'autre  
chose que d'auancer la mort du malade, & l'accompa-  
gner de tourment à l'exemple de ce premier Medecin,  
qui du Peloponese vint à Rome, & que les Romains  
nommerent le *Blesseur* ou *Faiseur de playes*, à cause de sa  
cruauté à couper & brusler les malades. Pourquoi  
cette grande Ville de Bourdeaux, & d'autres ébran-  
lées en leur deuoir? Pourquoi tant de familles diui-  
sées, & les plus proches amitez & alliances violées?  
De telle sorte que l'accomplissement des anciennes  
propheties semble estre proche, que le frere combattra  
contre le frere, l'amy s'attaquera à l'amy, l'enfant s'a-  
dressera au vieillard, & le roturier outragera le Noble.  
D'où vient que ie me trouue en plusieurs endroits cou-  
uerte & opprimée des gens de guerre? D'où viennent  
les armes des enfans, & des peres, des freres, des pa-  
rens & compatriotes rangées les vnes contre les autres?  
D'où vient que tout respect de la pudeur & de la Iusti-  
ce est mise sous les pieds? D'où vient que la seule force  
a esté appellée en conseil, & a donné le signal pour  
brouiller & renuerfer toutes choses? D'où vient que  
les crimes de leze-Majesté diuine & humaine sont de-  
clarez francs & libres de l'autorité des Loix? Tant y  
a qu'il semble que le fer & le feu, ont à présent vne puis-  
sance souueraine. Helas ! que diray-je icy ? ou com-  
ment



ment est ce que ie diray, ou en effet, qu'est-ce que ie ne diray point? Quelles paroles peuvent égaler l'enormité d'un si sanglant sujet, en quels termes l'exprimeray-je, & de quelles bornes pourray-je enfermer ces plaintes, & ces lamentations publiques?

Certes ie diray, quoy qu'à mon grand regret, que Basine Reyne de Turinge, a bien prophetisé de vous, ô mes indignes enfans, quand elle a dit, que la premiere lignée seroit comme des Lyons, & Leopards, la seconde, comme des Ours, & la troisieme, comme des chiés qui se deschireroient l'un l'autre. C'est ce qui se void accomplir en ce temps! O que mon genie est puissant en ces iours! Iours plus malheureux, que tous les iours noirs des Romains ensemble! Iours plains de miseres & de malheurs, que les tenebres & les ombres de la mort vous courent eternellement! Comment est-ce que l'Aurore peut en ce temps visiter la terre, puis qu'elle enfante des monstres si prodigieux? Est-ce pour me faire voir ces beaux chefs-d'œuvres de trahison, de perfidie, & d'impieté? Peu s'en faut que ie ne fusse comme les Libiens Apharantes, qui disoient des iniures au Soleil Leuant, & l'outrageoient comme celuy qui offroit à leur veuë tant de forte de maux & de calamitez. Et que voy-je au tour de moy, que des gens plus dangereux que les serpens, qui quelque venin, peste, poison, mort certaine qui soient en eux, n'attaquent jamais ceux qui sont de leur mesme espee? Le voisinage, l'alliance, le mesme sang, & la mesme maison, la communication de langue & de mœurs, qui deuroient estre les liens de paix, de concorde, & d'amitié, seruent aujourdhuy de flambeaux de guerre, de dissention, & d'inimitié.

O Dieu, quel changement de temps! Autrefois mes enfans paroissoient au loin contre les Estrangers, & maintenant ils tournent la pointe de leurs armes contre eux-mesmes! Où est le temps que les François donnoient



tant de batailles contre les Sarrafins, les Gots, les A-  
 riens, & les Vvandales, qui venoient inonder la Chre-  
 stienté d'un deluge de toutes sortes de maux & d'im-  
 pieté? Où est le temps auquel ils employoient leurs  
 moyens, leurs armes, & leurs vies, à repurger l'Espa-  
 gne de tant de Payens qui y fourmilloient, contrai-  
 gnans mesmes les Saxons, apres tant de victoires rem-  
 portées sur eux, tant de trophées & tant de triomphes,  
 de recevoir la Foy Chrestienne & Catholique? Où est  
 le temps qu'ils rangerent sous l'Etendard de la Croix,  
 & sous l'obeïssance de l'Eglise les Danois, & autres  
 peuples? Où est le temps qu'ils exterminoient l'heresie  
 dans les Champs Albigeois, qu'ils batissoient tant de  
 riches & de superbes Téples, & faisoient voir leur zele  
 à la Religion, & leur force aux combats & aux coins les  
 plus reculez, soit de l'Orient ou de l'Occidēt? Ne sont-  
 ce pas les François qui ont passé trois fois des Armées  
 en Levant? &, (ô gloire immortelle, & qui est par des-  
 sus tout l'honneur de tous les Peuples, Empires &  
 Royaumes) ont remis par quatorze fois les Papes en  
 leurs Sieges? On dit que de la Fleur de Lys, il se tire  
 vne huile, qui est non seulement d'agreable odeur, mais  
 tres-vtile aux maux de teste: En cette sorte les Papes,  
 qui sont les Chefs visibles de l'Eglise victorieuse, é-  
 prouuerent alors en leurs afflictions, ce que le Lys de  
 la Couronne de France leur valoit, quand tant de fois il  
 les a remis & raffermis dans leurs Throsnes. Neant-  
 moins à present, ô Temps, ô Mœurs, ces Lyons, ces  
 Leopards, ces Ours, selon la Prophetie de la Reyne de  
 Turinge, se sont metamorphosez en chiens, qui abayent  
 les vns contre les autres, se deschirent & se mangent!  
 Je ne suis plus aussi Prouince fleurissante, paisible, &  
 puissante, comme i'ay esté autrefois, & si long-temps,  
 qu'il n'y a Estat au monde qui soit égal en durée à l'Em-  
 pire des François; les maladies qui renuersent, & les  
 Prouinces, & les Monarchies, ne me touchoient que



peu ou point du tout. Je fleurissois chez moy en vertus, & particulièrement en Religion, en Iustice, & en Piété. I'estois abondante en Paix, & en richesses, i'estois puissante, & autant redoutée de mes voisins, que cherrie & aymée de mes enfans, outre tant de prosperitez. I'estois comblée d'une infinité de faueurs, & de benedictions spirituelles, d'auoir esté comme appelée par excellence, la Guyenne, l'une des plus belles & des plus riches Prouinces du Royaume Tres- Chrestien. Le Royaume de l'Eglise de Dieu, son heritage, sa part & portion qu'il a choisie en la Terre, & le Royaume qui a succédé au Royaume de Iuda. Au lieu qu'aujour-d'huy par vn changement bien estrange, ie me voy diuisée de Foy, & de Religion, & ceux mesmes d'entre mes Citoyens, qui sont vnis en croyance, ie les voy partagez de volonte, de desirs & de pretensions; ce qui ne peut estre que des augures tres-assurez & infailibles de ma destruction & entiere ruine.

Ie vous coniure, mes enfans, de vous ressouuenir ce que i'ay esté autrefois par l'union & concorde de mes peuples, & ce que ie suis maintenant deuenue par leur diuision. Considérez quelle a esté l'estenduë de l'Empire François durant le regne de mes Roys, Charles le Grand, & Louis le Debonnaire son fils: De ce temps-là cette Monarchie, dont ie fay l'une des meilleures parties, estoit bornée par la mer Oceane, iusques à l'extrémité de la mer Thirrene & de la mer Noire; de l'autre par le fleue Hebro d'Espagne, iusques au Danube & Boustheue. Ressouuenez-vous que la diuision qui se fit entre les enfans de ces deux grands Roys, de tant de grands pays & de Royaumes, a réduit enfin la France entre les Monts Pirenées, les Alpes, le Rhein, la mer Oceane, & la Mediterranée.

Représentez-vous encore les malheurs & les desastres, qui sont arriuez à ce florissant Royaume, par les grandes, cruelles & sanglantes dissensions des trois en-



sans de Louis le Debonnaire en la secôde lignée. Ils deuenerent de telle sorte la France, & l'espuiserent tellement d'hommes, d'armes & de moyens, que cette Monarchie, qui auparauant estoit redoutable à toutes les Nations du monde, qui auoit fait trembler l'Espagne, conquis vne de ses grandes parties, subiugué l'Allemagne, dompté la Lombardie, fait tributaires les Isles de l'Océan, qui s'estoit renduë effroyable aux Grecs, rechercher avec honneur, respect, & crainte de tous les Princes, & Peuples, voire des plus éloignez; mesme d'Aron Roy de Perse, ne laissa pas d'estre en suite le ioiet de la Fortune, & la proye de certains Pirates Danois, n'aguere ses tributaires, qui non seulement coururent toutes les côtes de la France, & se firent Maistres de la mer: mais descendans en terre, la pillerent & la rauagerent, prindrent, & ruinerent de fonds en comble plusieurs Villes, & assiegerent la Capirale. Si vn si grand Empire a bien esté affoibly par la diuision, peux-tu douter, pauvre Guyenne, qui n'est que la quinzième partie de son Estat, que le desordre & la confusion où ie te voy, ne te ruine & ne te perde?

O guerre ciuile ! maudite guerre, qui t'efforces à me ronger iusques aux entrailles; c'est de toy que i'ay principalement à me plaindre ! Guerre furieuse, en laquelle, quelque pretexte specieux qu'on puisse auoir, c'est tousiours le Roy Louis XIV. de Dieu donné, qui y est le plus offensé, & qui par consequent en deueroit conceuoir plus d'indignation, & d'aigreur que tout le monde. Guerre l'estrange guerre (puis que tu es proprement sans ennemis, & que c'est estre miserable que d'en sortir victorieux. Car triompher de ses Sujets, & de ses Citoyens & Compatriotes, est veritablement vn faux triomphe, & plustost digne de larme que de ioye. C'est en ce temps-là, que la force & le bonheur, sont vne espee de Sacrilege. Quels obiets plus pitoyables, quel spectacle plus funeste, que de voir  
tous



tous les iours les afflictions extrêmes, & la déplorable condition du pauvre Laboureur, nostre vray nourricier, auquel continuellement on rait le pain d'entre ses mains; pain detrempé de sa sueur, de ses larmes, & de son sang, sans compter toutes les barbaries du soldat, & la charge des Tailles excessiues, leuées ordinairement de part & d'autre; sans compter mille autres extorsions pleines de cruauté & de barbarie? Comme les mauuais humeurs du corps tombent ordinairement sur les plus basses parties, qui sont les pieds; ainsi les plus vicieuses humeurs de l'Estat, retombent coustumierement sur le pauvre peuple, qui en est le pied, la base, & le fondement. Pauvre Peuple! hélas? ie pleurs, ie prie, & crie pour toy; car tu ressembles au Crocodile, tu as bien des yeux pour pleurer, mais tu n'as point de langue pour parler, ny te plaindre. O Dieu! quel remede à tant de mal-heurs! Car si parmy ces fureurs ciuilles, on s'oppose vigoureusement aux desseins pernicious des meschans, il n'y a rien de cruel, à quoy les hommes ne se portent, voire iusques à se dépoüiller de toute humanité, pour exercer tout ce que peut la dissolution en villainies, la cruauté en tourment, l'auarice en rapines, & l'orgueil en contumelies. Tellement que le bon Bourgeois ne peut faire estat de ses biens, ne peut s'asseurer que la chasteté de sa femme ne soit point violée, la pudicité de ses filles rauie, & se couchant le soir, ne peut se promettre d'estre le matin en vie, ayant à tous momens la mort devant ses yeux, ou plustost vne vie languissante en captiuité, se représentant à toute heure vne cruelle prison, qui par le feu, qui par le fer, par la soif, par la faim, & qui par l'horreur des tenebres, exprime tout le suc & le sang du miserable captif. Guerre ciuile, tu es vn feu qui s'attache à la maison, dont il faut qu'on abate le toict, afin de sauuer le reste, couper chemin à la flamme, & preseruer les edifices voisins! Feu, dis-je, qui vas consumant petit à petit les fortunes,



& reduits les Royaumes en cendre ! Tempeste inexorable , en laquelle on iette en la mer tout ce qui est de plus beau , & de plus riche dans le vaisseau , pour resister à la furie des vents impetueux , & le guarentir de naufrage. Ainsi les Roys & les Princes souuerains , pressez par la necessité qui dōne la loy , & n'en reçoit point , afin que le corps de leur Estat subsiste , sont contrains de tolerer , de permettre , & de faire beaucoup de choses , qui autrement sembleroient moins iustes & raisonnables. Quel plus violent rauage ? Quel feu plus vehement , & quel naufrage plus dangereux , m'ont iamais menacée , que ceux que ie voy auourd'huy preparer pour me renuerfer , pour me consommer , & pour me perdre ? Je voy les membres d'un mesme corps se deschirer perpetuellement à la ruine commune du tout , ie voy l'œil gauche qui emprunte la main qui est son costé pour creuer le droit , sans considerer que le mal de l'un est le mal de l'autre.

Certes il faut que ie confesse , que ie me trouue en vne estrange malice de siecle , en vne detestable corruption de mœurs , & en vne furieuse intemperie d'esprits ! Ha ! ie voy bien que l'impieté est vn violent poison , capable de gaster en vn moment , non pas seulement la Guyenne , mais les Royaumes tous entiers. C'est elle , cette furie infernale , qui a mis entre les François , le nom & l'honneur de Dieu en vn tel mépris , ( sous lequel toutefois tremblent les Anges , les Diables fremissent , les Cieux s'abaissent , & les Enfers s'épouuentent ) que ie puis dire qu'elle est montée au comble de son iniquité. Il n'est auourd'huy parfum que du vice , la Vertu put , & son contraire est vne rose. C'est de ce mépris que sont sortis ces furieux , ces enragez , & ces maniaques , qui mettent le feu dans leur propre maison , semblables au flambeau de celuy qui brûla le Temple de Diane en Ephese , comparables à Pâris , qui fut la torche qui brûla Troye , & égaux à ces misera-



bles Citoyens , qui furent cause de la ruine de Hierusalem , & de la subuersion du Temple de Salomon.

C'est de ce mesme principe que decoule cette liqueur, qui fait flamber ces lampes funestes, qui au lieu d'huile, brûlent dans le sang , & ne luyssent que dans les cauernes des Cyclopes. C'est donc de là que sont sorties ces Cometes cheueluës , dont les rayons sont rouges & ardens, & qui ne presagent & ne menacent en terre, que souleuemens de Sujets contre leur Princes, que dissensions des Villes les vnes contre les autres, & que remuemens de Royaume, & subuersions d'Empires.

C'est par la mesme porte de l'impieté, & du mespris de la Diuinité, que sont entrez ces esprits dereglez, qui ne peuuent s'accommoder ny à bien faire, ny à bien dire, non pas mesme à bien ouïr dire personne; Ces zelateurs extraordinaires de l'équité, que de trop grand amour d'auoir la Iustice, se sont eux-mesmes precipitez en iniustice.

Et qui n'a veu entrer par là les soubçons & les defiances qui vous trauaillent tant, mes enfans, desquelles ie puis dire, que comme la Vipere & la Murene, n'engendrent point leurs Vipereaux & leurs Serpenteaux, au mal & à la ruine des hommes, qu'ils n'ayent premierement mangé & rongé le ventre auquel ils ont esté conceus : ainsi ces soupçons & ces distractions ne nuiront à personne, qu'ils ne vous ayent premierement ruinez & perdus? Tous les pretextes que vous prenez, ne sont qu'un sac mouillé contre la pluye, & un voile de crespé; car à la fin les intentions se voyent, les desseins se decouurent, & les ambitions se manifestent, tousiours autre estant le pretexte, & tousiours autre le dessein. Pour l'ordinaire, l'ambition en est la mere & la nourrice; les ambitieux oublient ordinairement deux choses, dont ils se deuroient bien souuenir, sçauoir la Iustice, & leur propre foiblesse. Qu'ils se souuiennent à tout le moins de la Iustice, & mesme de la ciuile, qui



n'est autre chose que le bien public, qu'ils l'embrassent à bon escient, & non pas par feintise; qu'ils n'en prennent pas simplement le manteau, pour couvrir leurs menées, leurs pratiques, leurs diuisions, & leurs souleuemens; ce qui arriue le plus souuent durant les troubles d'un Royaume, comme aussi de prendre le manteau de liberté, pour opprimer la liberté mesme, & de se couvrir du voile de Religion, pour pallier l'ambition & l'impieté. Autre est le pretexte, vous dis-je, & autre le dessein. Mais de quel costé me tourneray-je parmy tant & tant de malheurs? qui m'adresseray-je? de qui imploreray-je l'ayde & le secours, tant pour moy malheureuse, que pour mes miserables enfans?

O Dieu! ô Ciel! ô Anges! ô Terre! ô Hommes! Mais ô grand Roy! qui, quoy que ieune d'ans, commandez aux François, & qui portez le Sceptre de vos Ayeuls, avec autant d'auantage sur tous les Roys du monde, que le Lys est naturellement élevé au dessus des autres fleurs. Grand Monarque; c'est à vous, mon cher Prince, à qui j'ay recours, apres Dieu, pour moy & pour mes enfans vos Suiets, en vne si extreme & pressante necessité; C'est à vous, qui avez l'autorité & l'affection de Pere, d'aider à leur bien & conseruation, & l'auoir en autant ou plus grande recommandation que la vostre propre. Vous representez la grandeur & la Majesté de Dieu, qui a fait, qui regit, & qui gouverne cét Vniuers: & comme au Ciel il a mis pour image de sa Diuinité le Soleil, aussi a t'il donné en terre semblable lumiere en la personne des Roys, pour reluire icy bas, comme ce bel Astre reluit au Firmament. Il est bien vray que ce Firmament influë les principes des semences, puis la terre les produit; les vnes sont accreuës par les playes, les autres par les vents; les autres par la Lune, & par d'autres moindres Astres: mais c'est le Soleil qui viuifie, & qui anime toutes choses. Aussi de tous les grands biens que Dieu fait aux hommes, ils n'en



n'en pourroient pas iouir sans la Iustice, sans la Loy, & sans le Roy; la Iustice est la fin de la Loy, la Loy est l'œuvre du Roy, & le Roy est l'ouvrage & le chef-d'œuvre du grand Dieu. Ce que Dieu est pour l'Vniuers, le Roy l'est pour le regard de son Estat. Le Royau-me se rapporte, & ressemble à l'Vniuers, & le Roy, à Dieu, en tant que la nature humaine le peut souffrir. Soyez donc apres Dieu, le Dieu de vostre Estat, & soyez son Sauueur, & son salut. Soyez, SIRE, à moy & à mes enfans vn vray Mercure, & comme luy derobez la massue d'Hercule; Rauissez le Trident de Neptune, prenez les bœufs d'Apollon, & ostez les sagettes & le carquois au Soleil. Tout plein de diuinité & de courage, comme vn autre Alcide, avec la force de vostre Sceptre, terrassez les monstres de vostre Royaume, abatez les vices, domptez les vicieux, chassez les confusions en quelques lieux qu'elles se trouuent. Avec le Trident de vostre Puissance, de vostre Sageſſe & de vostre Iustice, comme vn Neptune accoisez les vens des dissensions, appeaisez les tempestes des diuisions, & pour lors vous deroberez les bœufs d'Apollon, quand par vn labeur continuel, vous conioindrez & vnirez tellement tous vos Sujets ensemble sous vostre autorité, & sous celle de la Reyne Regente vôtres Mères, que rien ne les puisse des-vnir, & que leurs volontez soient semblables, vnes, & constantes, & que les défiances & soupçons qui les ont tant trauaillez, soient bannis si loin, qu'ils n'ayent plus d'occasion de craindre qu'ils puissent retourner, pour les replonger en de nouvelles miseres.

C'est par cette voye, SIRE, que semblable à vn Soleil vous effacerez par la splendeur de vos actions Royales, le lustre des plus grands Princes & Monarques de la Terre. Ce sera lors que vos Lys embaumeront l'Vniuers d'une odeur tres-agreable; lors le manteau de gloire vous couurira plus richement que iamais, la



Couronne d'un immortal honneur enuironnera vostre chef, & les attours plus precieux de la grace celeste, qui est en vous, donneront vn éclat qui vous fera reluire par dessus tous les Roys du monde; tellement qu'il fera de vos labeurs, comme de la massüe d'Hercule, qui plantée en terre, germa vn grand & excellent Oliuier; car de vos veilles nous verrons naistre le repos, & de vos peines la felicité d'une paix asseurée.

SIRE, les maisons tombent lors que les poutres & les cheurons sont pourris, que les gros murs se laschent, que les toix sont gastez, & que le bois vermoulu n'a plus de force pour soustenir sa charge. Aussi lors qu'en ce vieil Royaume, qui a desia duré plus de douze cens ans, les plus Grands, tant de l'Eglise, que de l'Estat Politique; lors, dis-je, que ces poutres de Cyprez, & ces cheurons de Cedre seront rongez ou pourris par leurs vices, par leurs impietez, & par leurs sacrileges, ou qu'ils seront gastez par les diuisions, par les rebellions, par les souleuemens, & les guerres intestines; c'est lors que le pere deueroit craindre la cheute, & la ruine de cét excellent bastiment des François ses enfans. C'est vn miracle, SIRE, que la conseruation de vos Sujets, & de vostre Estat, parmy tant de desseins, & des resolutions obstinées de se nuire en nuisant, se blesser en blesfant, & se defaire en se defaisant. Je veux bien croire que l'Image d'or de la Fortune, qui estoit appelée *Tres-sainct Simulacre*, a esté portée en vostre chambre Royale, comme on la mettoit anciennement en la chambre des Empereurs Romains. Si bien que quand l'Empereur mouroit, cette Image estoit portée de sa Chambre en celle de son Successeur, & ce d'autant qu'ils croyoient que la Fortune estoit fille de la Prouidence; tellement que sa representation en la Chambre Imperiale, signifioit l'establissement & conduite du Royaume par la mesme Prouidence. Je veux croire tout cela, & que la diuine Prouidence, qui ayme tant les Lys, a



vn soin particulier du Grand Monarque des François, & de ses Sujets; c'est le tiltre aussi que soixante-cinq Roys Chrestiens, ont tousiours pris de *Regnans par la grace de Dieu*, reconnoissant par là, que leur regne depend immediatement de la Prouidence diuine: imitant la trompette, qui anime les plus courageux guerriers au combat. Je vous supplie & vous coniure, SIRE, par la memoire des trophées, tant de vous, que de vos Predecesseurs; par les cendres du feu Roy HENRY LE GRAND vostre Ayeul, par celles de son fils LOUIS XIII. vostre Pere, par l'affection que vous portez à la Reyne, vostre tres-chere & tres-honorée Mere, dont vous estes le sang, la chair, & les os, que vous arrestiez fermement cette Paix fuyante, cette Astrée qui offensée de nos desordres, branle l'Aigle pour s'enuoler au Ciel; & n'obmettez rien de ce que vous & vostre Conseil, iugerez estre necessaire pour cét effet. Conseil, qui est l'Assesseur & le Tutelaire des Roys, l'Autel de la Prudence, & le Timon d'un Estat. Auisez & resoluez les moyens les plus propres pour y paruenir, que ce ne soit point avec des paroles vaines, & qui se perdent avec le son, mais avec de bons effets, desquels vos enfans, & leur posterité ressentent le fruit. Prenez garde, ie vous prie, SIRE, que le remede que vous appliquez aux plus grandes maladies de vostre Estat, ne se tourne en poison, & ne dilayez plus le medicament au malade; car comme le mal ne peut venir tard, aussi le bien n'arrive iamais trop tost. Mais qu'est-ce que i'ay dit? A quoy est-ce que i'ay pensé? Qu'est-ce que i'ay fait, mon Roy en vous parlant de cette sorte? Vous m'avez preuenüe, & vous n'avez pas attendu les prieres pour bien faire à vos Sujets, & ce n'est pas sans raison, que ie vous comparois n'agueres au Soleil. Car tout ainsi que cét Astre n'attend point, ny les prieres ny les enchantemens pour se leuer & pour luire; mais sortant de son Tabernacle, comme l'Epoux de son lit nuptial, prenant sa course,



depuis vn bout des Cieux, iusques à l'autre, & par sa claire lumiere, dissipe l'obscurité de la nuit, & chasse les tenebres, embellit les Cieux, orne la mer, enrichit la terre, donne la chaleur aux choses, anime, réioüit, nourrit & conserue en son estre, tout ce qui est enclos dans cét Vniuers: De mesme vous, mon Soleil, n'avez point attendu les prieres & les supplications pour bien faire, & recherchant non pas la gloire ny la louange, mais le bien, le repos, & le soulagement de vostre peuple, de vous mesme, avez fait paroistre les effets de vostre bonté & douceur Royale, & plus que paternelle.

Mes enfans, mes Gascons, ie reuiens à vous pour vous dire, que vostre ieune & legitime Roy, afin de vous vnir & maintenir en paix, vnion & concorde fraternelle, resolut ces iours passez de donner connoissance de ses affaires, de ses desseins, & de ses resolutions à son Parlement de Bordeaux, où i'espere qu'on verra le Roy, & la Loy se reposer en ce liét de Iustice ensemble sous le mesme couuert. C'est au Parlement de Paris, où l'on le void souuent assis, à guise de Iupiter Olympien, tenant d'une main vne Victoire, & de l'autre vn Sceptre gracieux, qui est en la main de Iustice, ayant en sa teste vne Couronne d'Oliuier, qui est le Symbole de la Paix, & son manteau semé de Fleurs de Lys d'amour & de douceur. Cest là où il est cōme le grand Sapor Roy de Perse, au milieu de sa machine de Cristal, de laquelle il voyoit la rapide course de tous les Globes, le mouuement des Astres, les voyages du Soleil & de la Lune, en considerant qui faisoit les ombres droites ou gauches sur la terre. Que si les actions passageres des Roys, & leurs plus petits mouuemens sont autant de rayons qui sortent d'un Soleil animé; il faut croire que cette action solemnelle de nostre Roy, fera profondement imprimée dedans le cœur de ses bons & fidelles Sujets. A n'en point mentir, la gloire & la Majesté des Roys sont incomparables; mais celle du Roy,  
qui



quia depuis peu espousé la France, estant assis dans son liét de Iustice, c'est vne merueille qui surpasse toute merueille.

C'est donc en cét Auguste Parlement de Guyenne, où bien tost le Roy paroistra en sa Majesté, il nous a fait sçavoir, qu'apres auoir mis ordre par sa presence sur la Frontiere de Picardie, qu'il commencera de voyager par son Royaume, & particulièrement dans cette Prouince, pour remedier aux factions qui s'y sont tramées. Il imitera en ce faisant l'exemple du grand Hercule, lequel estant Roy Souuerain de tout l'Orient, faisoit vne continuelle reueuë deses Prouinces, pour en chasser les maux & incommoditez, qu'on a puis apres transformé en Monstres, & en Prodiges.

Nous vous demandons donc la Paix, **SIRE**, plustost que la Guerre, la Paix est le monde du monde, c'est l'ame de la Nature, c'est l'ame de la Bonté, & de la Beauté, c'est le lien des Creatures. La Paix est le cœur, la vie, & les esprits d'un Estat; la Paix est le chef-d'œuvre du Ciel, qui est vn present digne de vostre main, & la Paix comprend le salut, & la conseruation de vostre Royaume. Il est de la guerre, **SIRE**, en vostre Monarchie, comme d'une Religion nouvelle, telle qu'est celle de ce pays, que vos saints Edicts veulent estre appelez pretenduë reformée; car comme vn Globe ne peut toucher vn autre corps plein & égal, qu'en vn seul point; ainsi les regles de la Religion ne peuuent conuenir amiablement avec les regles d'Estat, qu'en vn seul point, à sçavoir celuy de la necessité, qui seule dispense de tolerer vne Religion autre que la Catholique, & qui appointe la conscience avec la Police, & l'Eglise avec l'Estat.

Qu'ainsi, **SIRE**, il n'y aye que les seules Loix de la necessité deormais, qui vous mettent l'espée à la main; mais aussi quand vous l'y aurez mise, Courage, **SIRE**,

EN



courage, car outrel'ayde qui vous viendra d'enhaut, vous pourrez dire hardiment, ce que dit vn iour le Roy Charles IX. accompagné de plusieurs grands Seigneurs de sa Cour, comme vn d'eux luy demanda, s'il luy plaisoit qu'il portast son espée, repartit soudain: *Je ne sçache point d'homme en mon Royaume, plus digne de porter mon espée que moy.* Voila vne repartie digne d'vn Roy de France, qui a d'autant plus de grace, que lors il estoit fort ieune.

Quand vous serez armé, & prest de paroistre à la teste de vostre Armée, comme vne Comete brillante, éblouissant les yeux de vos ennemis, faites, comme faisoient autrefois les Roys vos Predecesseurs, qui allans en guerre, portoient au iour des Batailles sur le Heaume, vne Couronne, & tout au faiste vne Fleur de Lys à quatre faces, afin que de tous les costez qu'on la verroit, elle retint la forme de Lys.

Et vous, mes chers amis, mes chers enfans, mes genereux Gascons, à quoy pensez-vous, que faites vous, sans songer à ce que vous faites? Quoy, voulez vous resister à vn Roy? Cela ne se peut, non plus qu'à Dieu mesme, qui le conduit, & le meine par la main. Croyez, vostre Mere, la Guyenne, qui a tant de fois consideré vos maux, & qui pense maintenant aux remedes: Je vay vous decourir, & monstrier mieux que iamais la source de tous vos malheurs. Vous vous estes laissé emporter au vent de la vanité, vous auez secoué le ioug diuin, & enyurez d'vne longue felicité, & indulgence de la Fortune, vous vous estes fiez en vos biens, sans en remercier, ny louer l'Auteur; c'est pourquoy il ne faut donc pas que vous vous estonniez, si par vn iuste iugement de la vengeance Celeste, vous auez esté des-vnis de cœurs, de conseils, de desseins, & de volonte, afin que vostre foiblesse vous attendrisse le cœur, vostre mal vous humilie, & vostre humilité



vous porte au Ciel, pour coniuurer la diuine Bonté, qu'il luy plaife, vous reünissant ensembles, de vous remettre en vostre premiere splendeur. Venez donc, mes enfans, reuenez François à vous mesmes, dressez-vous droit au Ciel, comme le Cedre, esleuez-y vos pensées, comme cét arbre fait ses branches, & portez tousiours vostre cœur en haut, cōme il ayne les Montagnes, qui fait qu'il ne se moisit iamais; aussi pour cette consideration les Payens en faisoient, les Idoles de leurs Dieux. Cherchez vostre conseruation dans le Firmament, & non pas dās les entrailles de la terre, où vous auez trouué le fer pernicieux instrument de la mort, de la vie humaine, que cette terre a neantmoins caché bien auant, comme chose tres-nuisible, & qui ne sort de ses tenebres, que pour faire mal à l'homme. Ce metal n'est point le remede à vos maux, c'est à Dieu premiere-ment, auquel il faut auoir recours, comme estant le premier ressort de nostre machine, sans lequel les autres sont immobiles. Mais, apres Dieu, iettez les yeux sur vostre Roy, sur vostre grand Roy, quoy qu'en bas âge, vostre Prince naturel, ce Monarque, cét enfant de Roy, vray Successeur & legitime heritier de la Couronne, & du courage de *Louis le Iuste*, son Pere, de glorieuse memoire, venez, & vous auancez, pour rentrer dans la maison d'où vous estes sortis. Le Roy vous attend les bras ouuers, pour vous recueillir comme ses enfans, & les miens ! Que si, par ie ne sçay quel malheur, vous auez cy-deuant perdu le respect, & la qualité de vrais & de fidelles enfans, il n'a pas perdu ce qui estoit de l'amour & de l'affection de vray pere.

Venez donc, & vous approchez, ne craignez point, l'amitié qui est reconciliée, est plus forte & plus ferme, que celle qui n'a iamais esté interrompue, & il n'y a point de telles caresses, qu'entre amis qui se sont cour-



roucez. Venez donc voir vostre Roy, & adorez l'ima-  
ge viuante en terre du Dieu viuant, qui est au Ciel; &  
puis qu'il est L O V I S XIV. de Dieu donné, rendez-  
luy ce qui luy est deu, reuez sa Couronne, abbaissez-  
vous sous la grandeur de son Sceptre, redoutez sa main  
de Iustice, & vous mettez à couuert sous son manteau  
Royal semé de Fleurs de Lys, marque de sa douceur  
Royale, capable non pas seulement de couvrir ses en-  
fans & Sujets, qui se retirent sous son ombre; mais aus-  
si les Peuples Estrangers, & les fauoriser de sa prote-  
ction, comme ont fait plusieurs fois ses Predecesseurs  
les plus grands Princes de la terre. Les Roys de Chy-  
pre ont autrefois demandé cette protectiõ, & l'ont ob-  
tenuë. Les Roys d'Armenie, les Roys de Hierusa-  
lem, ceux de Portugal & de Hongrie, & entre nos voi-  
sins, aucun ne l'a requise, qui en aye esté refusé. Ainsi  
ce manteau Royal a seruy comme de retraite à tous  
les affligez, & tous les Roys Chrestiens de la terre, s'y  
sont mis à l'abry, pour se guarentir des orages qui les  
menaçoient. O l'heureux iour, en laquelle on verra  
cette aymable reünion du Roy avec ses Sujets, cette  
liaison du pere, avec ses enfans! Concorde toute diui-  
ne, qui ne sera pas si tost logée au sacré Palais de vostre  
Roy, qu'elle se communiquera par toutes les Prouin-  
ces, par toutes les Villes, & par toutes les familles de  
cét Estat, ainsi que les lignes de leur centre s'en vont à  
la circonference, & comme les esprits animaux, vitaux  
& raisonnables, sont départis par tout le corps au  
moyen du cœur, du foye, & du cerueau.

O grand Dieu des Armées, qui tiens deffous tes  
pieds la Nature des choses, qui d'un clain d'œil font  
marcher deuant toy la troupe brillante des Astres des  
Cieux, qui seul manie les resnes du Destin, & de la  
Fortune. Dieu, Roy des Roys, Protecteur des Roys,  
Defenseur des Monarchies, & le seul salut des Peu-  
ples,



ples, qui des tenebres fais naistre la lumiere, & qui du desespoir tire de l'esperance, ouvre les yeux de ta pitié & misericorde, sur cette pauvre & desolée Prouince de Guyenne, & sur ses pauvres enfans ! Me voicy deuant le Throne de ta Diuinité, prosternée en terre, arrousee de mes larmes ; larmes qui me seruent de paroles, paroles qui tesmoignent bien assez suffisamment l'excez de mes douleurs, & de mes cuisantes amertumes. O Dieu ! qui as de telle sorte chery le Lys, qui est la liurée de la France, son Symbole, & la gloire de ses Armes, que tu l'as fait planter deuant ton Temple sur deux belles Colomnes, & dedans ta sainte Maison en tant de lieux, mesme en ton sacré Sanctuaire, pour auoir tousiours cette Fleur presente deuant tes yeux, pour te seruir comme d'un parfum agreable, voulant predire à tout le monde par ce moyen, combien les mœurs des François, qui deuoient fonder cet Empire, combien leur pieté, leur Religion, & leur valeur, seroit de bonne odeur en ton saint Tabernacle, c'est à dire, en ton Eglise. Ne permets pas, Roy de gloire, Grand Maistre des Batailles, Seigneur des Exercices, que cette Fleur se fane, releue son lustre & sa beauté, fais fleurir parmy les Gascons, mes enfans, la Iustice & la Pieté, la Religion & l'Estat, la Foy, la Charité & la Paix. Entreprends, & fais, s'il te plaist, ce chef d'œuvre du Ciel, tu le peux, si tu le veux, tout t'est facile, ton Sceptre diuin sera le Caducée qui conduira, induira, & reduira mes enfans à tes saintes volontez, & qui fera germer dans leurs ames, les germes de la bonté.

O Dieu, assiste LOUIS XIV. leur Pere, leur Roy, leur Pasteur, & mon Prince ; assiste-le, & luy enuoye secours de ton Saint lieu, afin que comme Pere, il pacifie ses enfans ; comme Roy, il r'allie ses



Sujets ; & comme Pasteur , il reünisse ses ouailles  
 sous la houlette de son Sceptre. Sauue la Fleur de  
 Lys , sauue la Couronne , sauue le Sceptre de ce  
 grand Monarque , & soustiens puissamment le bras  
 de ce Prince mineur : Marche deuant luy , fais voye  
 à ses iustes desseins , & conduis à bonne fin ces iu-  
 stes entreprises ? Sois son Arche d'Alliance , & son  
 Auriflam , & son Guidon , & fais que tant de millions  
 d'ames , qui respirent en cette Monarchie , flechissent  
 toutes sous le ioug tres-agreable de ses Loix ?

F I N.